

四庫全書

史部

欽定四庫全書

史部

唐六典卷八至十

詳校官監察御史臣劉芬

編修臣程嘉謨覆勘

總校官庶吉士臣倉聖脉

校對官檢討臣龔大萬

謄錄監生臣黃永澄

欽定四庫全書

唐六典卷八

唐

張九齡等撰

門下省

門下省

侍中二人

黃門侍郎二人

給事中四人

錄事主事各四人

令史十二人

書令史二十二

田庫令史七人

傳制八人

亭長六人

修補制敕匠五人

掌固十人

左散騎常侍二人

諫議大夫四人

左補闕二人

左拾遺二人

起居郎二人

令史三人

典儀二人

贊者十二人

城門郎四人

令史一人

書令史二人

門僕八百人

符寶郎四人

令史二人

書令史三人

主寶六人

主符三十人

主節十八人

弘文殿學士無常員

校書郎二人

學生三十人

令史二人

楷書手二十五人

典書二人

搨書手三人

筆匠三人

熟紙裝潢匠八人

亭長二人

掌固四人

侍中二人正三品

漢書百官表云侍中皆加官所加或列侯將軍卿大夫無員多至四十人

得入禁中諸曹受尚書事皆秦制漢官云秩比二千石董巴與服志侍中冠武弁大冠亦曰惠文冠加金璫附蟬為文貂尾為飾侍中服之則左貂常侍則右貂金取堅剛百鍊不耗蟬取居高飲清貂取內勳悍外溫潤本趙武靈王胡服之制秦滅趙得其冠賜侍中焉漢制分掌乘輿服物功高者一人為正僕射後漢初亦加官出

宣帝命八備顧問法駕出多識者一人參乘兼負傳國璽操斬白蛇劍餘皆騎在乘輿車後從駕入廟祠天子上堂盥以巾奉酒魏武改僕射為祭酒蔡質漢官典職曰侍中在尚書僕射下尚書上舊與中官皆止禁中宿直廬在石渠門外武帝時侍中僕射馬何羅挾刀謀逆由是侍中出禁外王莽秉政復止禁中惠帝元和中侍中郭舉與後宮通伏誅由是復出外靈帝時侍中舍有八區論者因言員有八人未詳也獻帝起居注云初置侍中六人出入禁中近侍帷幄省尚書事魏氏侍中置四人省祭酒祭而加官不在數服秩依漢氏掌賓贊威儀大駕出則次直侍中護駕正直侍中負璽陪乘不帶劍餘皆騎從御登殿與散騎常侍對秩侍中居左常侍居右備切問近對拾遺補闕晉令侍中品第三武官絳朝服佩水蒼玉東晉桓溫奏省二人後又復舊宋氏掌奏事直侍左右殿內門下衆事皆掌之餘同晉氏齊氏又以高功者一人為祭酒掌詔令機密朝會多以美姿

容者兼其官餘同宋氏梁氏秩二千石品第三後班第
十二與給事黃門侍郎一人對掌禁令陳氏依梁後魏
侍中六人加官在數初從第一品中太和末革令正第
三品北齊因之掌獻諫正及進御之職後周天官府
置御伯中大夫二人天子出入則侍中左右大祭祀盥
洗則受巾武帝改御伯為納言蓋侍中之職也宣帝末
又別置侍中為加官隋氏諱忠改為納言置二人正三
品掌陪從煬帝十二年改納言為侍中皇朝初為納言
武德四年改為侍中初秦漢置侍中曹無臺省之名自
晉始有門下省歷宋齊梁陳後魏北齊隋國初皆曰門
下省龍朔二年改為東臺左相咸亨元年復舊光宅元
年改為鸞臺納言神龍元年復舊開元元年改為黃門
監五年復舊曰
門下省侍中

侍中之職掌出納帝命緝熙皇極總典吏職贊相禮儀

以和萬邦以弼庶務所謂佐天子而統大政者也凡軍

國之務與中書令參而總焉坐而論之舉而行之此其

大較也凡下之通于上其制有六一曰奏抄謂祭祀支度國用投

六品以下官斷流已下罪六品以下官斷流已下罪二曰奏彈謂御史糾劾百

及除免官當者並為奏抄謂御史糾劾百三

曰露布謂諸軍破賊中尚四曰議謂朝之疑事下公卿

之五曰表六曰狀蔡邕獨斷凡羣臣上書通於天子者

議章者稱稽首上以聞謝恩陳事詰闕通者也奏者上

言稽首言下言稽首以聞其中有所謂若罪法劾案公

府送御史臺卿校送謁者臺通者也表者上言臣某言

下言臣某誠惶誠恐頓首頓首死罪死罪左方下附曰

唐六典

五

臬官臬中上以詣尚書通者也公卿校尉諸將不言姓大夫以下皆言姓報章曰聞報奏曰可具表文尚書報所上云已奏如書凡表章以啓封其言密事得皂囊其有疑事公卿百官會議而執異意者曰駁議曰臬主甲議可為如是下言愚臆議異其合於上意者文報曰臬官臬中議可漢承秦法羣臣上書皆言昧死言王莽篡

古改昧死曰稽首光武因而不改章奏制度自漢已後多相因循隋令有奏抄奏彈露布等皇朝因之其駁議表狀等至今常行其奏抄皆審署申覆而施行焉

復奏畫可

露布侍中審自餘不審

皆審署申覆而施行焉

畫可

訖留門下省為案更寫一通侍中

凡法駕行幸則負寶

以從

秦漢初置侍中主諸御物品秩亦卑晉魏以來其任漸重至隋乃為宰相之職任負責之儀因而不

改甚非尊崇

大朝會大祭祀則版奏中嚴外辦以為出

宰輔之意

入之節輿駕還宮則請解嚴所以告禮成也凡大祭祀

皇帝制齋既朝則請就齋室將奠則奉玉及幣以進盥手則酌盥

水以奉及贊酌汎齊進福酒以成其禮焉若饗宗廟則進瓚

而贊酌鬱酒以裸既裸則贊酌醴齊其餘如饗神祇之禮

籍田則奉耒以贊事

唐禮康儀令供耒司農卿受之以授侍中

凡諸侯王及四夷

之君長朝見則承詔而勞問之臨軒命使冊后及太子

則承詔以命之

唐禮侍中前承詔降宣詔曰冊某氏女為后命公等持節展禮冊太子亦如之

凡制勅慰問外方之臣及徵召者則監其封題若發驛

遣使則給其傳符以通天下之信凡官爵廢置刑政損益皆授之于記事之官既書於策則監其記注焉凡文武職事六品以下所司進擬則量其階資校其材用以審定之若擬職不當隨其便屈退而量焉

黃門侍郎二人正四品上

晉職官志云黃門侍郎秦官也無常員掌侍從左右漢因

之秩六百石劉向戒子歆書曰今若年少得黃門侍郎要處也應劭曰黃門侍郎每日暮向青瑣門拜謂之夕郎初秦又有給事黃門之職漢因之至後漢并二官曰給事黃門侍郎掌侍從左右關通中外諸王朝見則引王就坐至獻帝時與侍中各置六員出入禁中近侍帷幄省尚書事後又改為侍中侍郎尋復舊為給事黃門

侍郎魏氏置四人東晉桓溫奏省二人後又復舊所掌
與侍中俱置四人管門下衆事與散騎常侍並清華而
代謂之黃散焉晉令品第五秩六百石武冠絳朝服宋
氏因晉而郊廟則一人執蓋臨軒朝會則一人執麾齊
因晉宋又與侍中叅典詔命侍中呼為門下給事黃門
侍郎呼為小門下梁氏增秩二十石品第五後班第十
與侍中同掌侍從左右儋相威儀盡規獻納紀正違闕
監合嘗御藥針璽書高功者一人與侍中祭酒對掌禁
令陳氏因梁後魏給事黃門侍郎史闕其員初正第三
品太和末正第四品上北齊置六人品依魏氏所掌與
侍中同後周天官府置御伯下大夫二人武帝為納言
下大夫掌貳納言上大夫之職隋置四人正第四品上
煬帝減二人去給事之名直曰黃門侍郎隋氏用人並
重皇朝因之龍朔二年改為東臺侍郎咸亨元年復舊
光宅元年改為鸞臺
侍郎神龍元年復舊

黃門侍郎掌貳侍中之職凡政之施張事之與奪皆參議焉若大祭祀則從升壇以陪禮皇帝盥手則奉巾以進既悅則奠巾于篚奉匏爵以贊獻凡元正冬至天子視朝則以天下祥瑞奏聞

給事中四人正五品上

漢書百官表云給事中亦加官所加或大夫博士議郎皆秦制

漢議註諸給事中曰上朝謁平尚書奏事分為左右以有事殿中故曰給事中多名儒國親為之掌左右顧問位次中常侍後漢省其官魏氏復置或為加官或為正員晉氏無加官亦無常員隸散騎省位次散騎常侍晉令云品第五武冠絳朝服束齊隸集書省位次諸散騎下奉朝請上梁陳秩六百石品第七與諸散騎常侍侍

從左右獻納得失省諸奏聞後魏史闕其員初從第三
品上太和末從第六品上北齊集書省置六十員從第
六品上後周天官府置給事中士六十人掌理六經及
諸大誌給事於帝左右其後六官之外又別置給事中
四人隋初於門下省置給事中二十人掌陪從朝直煬
帝名給事郎減置四人位次黃門侍郎下從第五品掌
省讀奏皇朝又曰給事中龍朔二
年改為東臺舍人咸亨元年復舊

給事中掌侍奉左右分判省事凡百司奏抄侍中審定
則先讀而署之以駁正違失凡制勅宣行大事則稱揚
德澤褒美功業覆奏而請施行小事則署而頒之凡國
之大獄三司詳決若刑名不當輕重或失則援法例退

而裁之凡發驛遣使則審其事宜與黃門侍郎給之其
緩者給傳即不應給罷之凡文武六品已下授職所司
奏擬則按其仕歷深淺功狀殿最訪其德行量其材藝

若官非其人理失其事則白侍中而退量焉

若文武進級至于三

品五品則覆其入仕之階考會所由之狀而奏裁之凡制敕文簿授官甲應皆貯之於庫監其檢覆以出入焉

其弘文館圖書繕寫讎校亦課而察之凡天下冤滯未
申及官吏刻害者必聽其訟與御史及中書舍人同計

其事宜而申理之

每日令御史一人共給事中中書舍人受詞訟若告言官人事害政者及

抑屈者奏聞
自外依常法

錄事四人從七品上

後魏門下省錄事從第八品北齊門下錄事置四人從第八品上隋

氏置六人煬帝三年加門下錄事為正第八品皇朝置三人龍朔二年改為東臺主書咸亨元年復舊開元初

減置一人

主事四人從八品下

晉置門下主事歷宋齊品第八梁陳名為門下主事令史北齊門下

主事令史八人從第八品上隋初請臺省並置主事令史煬帝三年直曰主事舊令從九品上開元二十四年

勅加入從八品上

田庫令史七人

晉置門下令史品第九宋及梁陳並同晉氏後魏北齊門下並有令史及書令

史自漢以來令史皆有品秩至隋開皇初始降為流外行署

傳制八人

晉書劉裕舉義兵罷徐州刺史栢循令何無忘偽著傳詔服稱敕宋城中無敢動者又齊

受禪時侍中謝朓在直傳詔呼云須侍中解印朓曰齊當自有侍中乃朝服步出梁陳二代並有傳詔之職而用人猶重天后改為傳制掌送制敕流外之中最小吏也分番上下亦呼為番官

左散騎常侍二人從三品

秦置散騎又置中常侍具散騎傍乘輿專獻可替否中常

侍得出入禁中常侍左右漢因之並用士人無常員皆加官所加或列侯將軍卿大夫等冠武冠皆銀瑤附蟬為文貂尾為飾謂之貂蟬後漢省散騎而中常侍改用宦者魏黃初復置散騎與中常侍合為一直曰散騎常侍復用士人晉置四人典章表詔命優文策文等雖隸門下別為一省潘岳云寓直散騎之省是也又領六散

騎則有員外散騎常侍無常員魏末散騎常侍有在員外者因名焉又有通直散騎常侍四人晉太始十年使二人與散騎常侍通員直因名焉又有散騎侍郎四人魏與散騎常侍同置自魏至晉散騎常侍與中黃門侍郎共平章尚書奏事江左乃罷之又有員外散侍郎無常員晉武所置又有通直散騎侍郎四人東晉并中書入散騎省故庾亮讓中書牋曰方今并省不宜多官往以中書事并附散騎此事宜也方今喉舌之要則任在門下表章詔命則取之散騎殊無事復立中書也晉代此官選任愈重時與黃門侍郎謂之黃散晉令云散騎常侍品第三冠右貂金輝絳朝服佩水蒼玉案置散騎常侍四人亦以加官九次者為祭酒領六散騎馬又置集書省領之齊因省祭酒之號梁因之而加秩中一十石後班第十二高功一人為祭酒與散騎侍郎一人對掌禁令自宋以來用人雜故其官漸替梁大同雖革選此侍中而人終不見重天監六年詔曰帶騎常侍

員外散騎常侍通直散騎常侍為清望宜革選恭舊例
自是散騎視侍中通直視中丞員外視黃門侍郎陳氏
因之後魏集書省置散騎常侍第二品太和末從三品
亦領六散騎比齊置六人餘同魏氏後周散騎常侍為
加官隋文帝門下省置散騎常侍四人從第三品掌陪
從朝直亦置六散騎常侍開皇六年省員外散騎常侍
煬帝三年又省散騎常侍散騎侍郎武德初散騎常侍
加官貞觀初置散騎常侍二員隸門下省顯慶三年又
置員外隸中書省始有左右之號並金蟬珥貂左散騎
與侍中左貂右散騎與中書令右貂謂之八貂龍朔二
年改為左常侍
咸亨元年復舊

左散騎常侍掌侍奉規諷備顧問應對

諫議大夫四人正五品上

漢書百官表云秦諫大夫屬中令無常員多至數十人掌

議至武帝元狩六年始因秦置之秩比六百石光武中興諫議大夫置十三員魏氏因之史闕員品晉宋齊梁陳並置至後魏始置之正第四品北齊集書省置諫議大夫七人從第四品下後周地官府置保氏下大夫一人掌規諫皆其任也隋氏門下省置諫議大夫七人從四品下皇朝置四人龍朔二年改為正議大夫神龍元年復舊諫議大夫掌侍從贊相規諫諭凡諫有五一日

諷諫

風之以言謂之諷諫孔子曰諫有五吾從風白虎通曰人懷五常之性故有五諫也

二曰順

諫

謂其所不可不敢逆而諫之則順其君之所欲以微通之若優旃之比

三曰規諫

謂陳其規

而正其事四曰致諫

謂致物以明其意

五曰直諫

謂直言君之過失必不得已然後為

者之

左補闕二人從七品上

皇朝所置言國家有過闕而補正之故以名官焉詩云衮職有

闕仲山甫補之蓋取此義後漢伏湛出入禁闕拾遺補闕魏志文帝勅侍臣曰公卿等宜拾朕之遺補朕之缺晉武帝詔曰公卿等宜補闕拾遺獻可替否晉職官志御登殿侍中居左散騎常侍居右備切問近對拾遺補闕後魏孝文帝令侍中李冲補闕左右垂拱中因其義而創立四員左右各二馬天授初左右各加三員通前為十員神龍初依舊各置二人其才可則登不拘階敘又置內供奉無員數才職相當不待闕而授其資望亦與正官同祿俸等並全給右補闕亦同

左拾遺二人從八品上

皇朝所置言國家有遺事拾而論之故以名官焉史記汲黯曰

臣願為中郎署長出入禁闕補闕拾遺漢書元帝初立給事中劉向侍中金敞拾遺於左右後漢張衡為侍中

恒居帷幄從容諫議拾遺左右後魏初置內侍長主拾遺應對若今之侍中散騎入孝文帝命侍中邱悅拾遺左右垂拱中因其義而創立四員左右各二馬天授初左右各加三員通前共為十員神龍初依舊各置二員才可則登不拘階級亦置內供奉無員數資望俸祿並如正官右拾遺亦同

左補闕拾遺掌供奉諷諫扈從乘輿凡發令舉事有不便於時不合於道大則廷議小則上封若賢良之遺滯於下忠孝之不聞於上則條其事狀而薦言之

起居郎二人從六品上

起居郎因起居注以為名起居注者紀錄人君動止之事春秋

傳曰君舉必書禮云動則左史書之言則右史書之又曰左史記事右史記言言為尚書事為春秋皆其事也

宋衷世本云沮誦蒼頡為黃帝左右史周書穆王時有左史戎夫書前代存亡之誠諸侯之國亦立之晉武帝時得汲冢書有穆天子傳體制與當時起居注正同蓋周左右史之所錄也漢武有禁中起居注後漢明德皇后撰明帝起居注然則漢時起居注似在宮中為女史之職魏晉已來皆中書著作兼修國史元康二年著作隸入秘書別名著作省歷宋齊梁陳皆掌國史後魏及北齊集書省領起居注今史之職從第七品上後周春官府置外史掌書言及動作以為國誌即其任也又有著作二人掌綴國錄蓋起居著作自此分也隋省內史舍人四員而始置起居舍人二員皇朝因之貞觀二年省起居舍人移其職於門下置起居郎二員顯慶中又置起居舍人始與起居郎分在左右龍朔二年改為左史咸亨元年復故天授元年又改為左史神龍元年復故

今史三人

先置楷書手
今改為令史

起居郎掌錄天子之動作法度以修記事之史凡記事之制以事繫日以日繫月以月繫時以時繫年必時書其朔日甲乙以紀厯數典禮文物以考制度遷拜旌賞以勸善誅伐黜免以懲惡季終則授之于國史焉

漢獻帝及

西晉以後諸帝皆有起居注皆史官所錄自隋置為職員列為侍臣專掌其事每季為卷送付史官

典儀二人從九品下

周禮秋官有司儀上士八人中士十有六人蓋皆典儀之任也齊職

儀云東官殿中將軍屬官有導客局置典儀錄事一人掌朝會之事史闕其品秩梁有典儀之職未詳何曹之

官掌唱警唱奏之事朱服武冠陳亦有之後魏置典儀監從第五品史闕其員及所掌皇朝置典儀二人隸門下省初用人皆輕至貞觀初李義府爲之是後常用士人領贊者以知贊唱之節

贊者十二人

隋太常寺有贊者十六人鴻臚寺有贊者十二人皇朝因置之隸門下省掌贊唱爲

行事之節分番上下亦爲之番官

典儀掌殿上贊唱之節及設殿庭版位之次

若元正冬至大朝會

王公外殿既坐酒至而起皆傳贊唱而爲之節也

凡國有大禮侍中行事及進

中嚴外辦之版皆贊相焉

城門郎四人從六品上

周禮地官有司門下大夫二人上士四人蓋城門郎之任也初

漢置城門校尉員一人秩二十石掌城門屯兵有司馬及丞各二人十二城門候各二人出從緹騎百二十人蓋兼監門將軍之職魏因之晉氏品第四秩二十石銀章青綬絳朝服武冠佩水蒼玉元帝省之宋齊俱以衛尉掌宮城屯兵及管鑰之事梁陳二代依秦漢以光祿卿掌宮殿門戶亦無城門之職後魏置城門校尉第三品下太和末第四品上北齊衛尉寺統城門寺置城門校尉二人第四品上掌宮殿門并諸倉庫管鑰之事而後周地官府置宮門中士一人下士一人掌皇城五門之禁令又置城門中士一人下士一人掌皇城十二門之禁令蓋並其任也隋氏門下省統城門局校尉二人從第四品下煬帝三年又隸內省十二年又減一人降爲正第五品後又改校尉為城門郎置四人從第六品又隸門下省皇朝因之

門僕八百人

按晉光祿勳左中郎將有崇禮等門僕各二人隋有太廟郊社門僕皇朝城門郎置

門僕分番上
下掌送管鑰

城門郎掌京城皇城宮殿諸門開闔之節奉其管鑰而

出納之

明德等門為京城門朱雀等門為皇城門承天等門為宮城門嘉德等門為宮門太極等門為

殿門通內等門並同上
閣門東都諸門准此

開則先外而後內闔則先內而

後外所以重中禁尊皇居也候其晨昏擊鼓之節而啓

閉之

承天門擊曉鼓聽擊鍾後一刻鼓聲絕皇城門開第一擊聲絕宮城門及左右延明乾化門開第

二擊聲絕宮殿門開夜第一擊聲絕宮殿門開第

二擊聲絕宮城門閉及左右延明門皇城門閉其京

城門開閉與皇城門同刻承天門擊鼓皆聽

凡皇城宮

城闔門之鑰先酉而出後戌而入開門之鑰後丑而出

夜盡而入

宮城皇城鑰匙每日入前五刻出閉門一更二點進入五更一點出開門夜漏盡第二鑿

鑿後二刻而進入

京城闔門之鑰後申而出先子而入開門之

鑰後子而出先卯而入

京城門鑰匙於東廊下貯納每去日入前十四刻出閉門二更

一點八四更一點出開門夜漏盡第二鑿鑿後十刻入

若非其時而有命啓閉則

詣閤覆奏奉旨合符而開闔之

殿門及城閉若有敕夜開受敕人具錄須開之

門宣送中書門下其牙內詣門城門郎與監直監門將軍郎將各一人俱詣閤覆奏御注聽即請合符門鑰對勘符然後開之凡車駕巡幸所詣之所計其應啓閉者先發而請其管鑰及至即開闔如京城之制

符寶郎四人從六品上

周禮地官有掌節春官又有典瑞並其任也自漢以來唯旌節

稱節餘皆號符馬寶即璽也秦為符璽令史記云始皇出遊會稽丞相李斯中車府令趙高從高兼行符璽令事是也漢因秦置符節令丞屬少府漢官云秩四百石漢書云昭帝幼冲霍光秉政殿中夜驚光召符璽郎取璽郎不與光奪之郎按劍曰臣頭可得璽不可得光壯之增秩二等後漢則別為一臺亦屬少府置符節令一人為臺率主符節事凡遣使掌授節令尚符璽郎中四人兩漢皆傳秦六璽及傳國璽魏符節令位次御史中丞晉武帝太始元年省并蘭臺置符節御史宋因之齊置主璽令史於蘭臺以侍書御史領之梁陳御史臺並置符節令史後魏御史臺置符節令領符璽郎中初從第四品中太和末從第六品上北齊御史臺領符節署令一人領符璽郎中四人後周天官府置主璽下士四人分掌神璽傳國璽與六璽之藏隋初門下省統六局

符璽局置監二人正第六品上直長四人從第七品上
賜帝二年改為郎從第六品皇朝因隋置符璽郎四人
天后更名符寶郎授命及神璽等八璽文並琢為寶字
神龍初復為符璽郎開元初又為符寶郎從璽文也

主寶六人

寶即璽也周書曰湯放桀大會諸侯取天子
之璽置天子之座古者印璽二名尊卑共之

諸侯大夫印亦稱璽春秋左傳曰季武子使季冶問璽
書追而與之是也主寶掌之分番上下亦謂之番官

主符三十人

漢文帝時與郡守為竹使符第一至第五
以代周之鎮圭納兵為銅獸符第一至第五

五以代周之牙璋各分半右留京師左以與之皆符合
為信六國時魏公子無忌竊兵符矯命殺晉鄙則六國
亦有之後漢太守都尉初除與璽書及於兵亦與璽書
或與詔書姦偽刻造無由檢知至順帝以此制煩擾但
召符節令發銅獸竹使符耳歷魏晉宋梁陳皆用之後
魏有傳符歷北齊隋皆用之武德初為銀莢符後改為

魚符又有傳符主符掌之分番上下亦謂之番官

主節十八人

主節掌守幡節並分番上下亦謂之番官

符寶郎掌天子之八寶及國之符節辨其所用有事則請於內既事則奉而藏之八寶一曰神寶所以承百王

鎮萬國二曰授命寶所以修封禪禮神祇

徐令言玉璽記曰玉璽者

傳國璽也秦始皇取藍田玉刻而為之其書李斯所製回文曰受命于天既壽永昌璽上隱起為盤龍文文曰受天之命皇帝壽昌方四寸紐五龍盤秦滅傳漢歷王莽為元后授之于地遂一角缺莽滅校尉公賓就收璽綬詣更始於宛更始敗以璽上劉盆子盆子降而縛上璽綬光武光武祠於高廟受傳國璽至靈帝崩少帝失

位掌璽者投于井中為孫堅所得袁術拘其妻而奪之
術死荊州刺史徐繆得璽還許上之漢滅傳魏至晉懷
帝璽没于劉聰聰死劉曜得之又傳於石勒石李龍冉
閔石李龍摩其隱起之文又刻其傍為文曰天命石氏
後冉閔敗其將蔣韓求救於晉遂以璽送建業永和八
年也歷東晉宋齊梁侯景竊位為景所得景敗為將侯
子監盜璽走江東懼追兵至投諸佛寺為棲霞寺僧永
得之陳永定三年僧永兄弟子普智奉獻陳亡璽傳於
隋又晉陽秋云晉孝武十九年雍州刺史郗恢於慕容
永處得璽乃送建業其璽方六寸厚一寸七分高四寸
六分蟠龍隱起文字巧妙一與傳國璽同但形制高入
玉色不逮耳自晉至梁相傳謂之鎮璽及侯景敗侍中
趙思齊挾以度江兗州刺史郭元建得之以送于齊文
宣帝齊亡入周周傳于隋隋文帝初亦謂之為傳國璽
開皇二年改為授命璽至開皇九年平江南得真傳國
璽乃改前所得大者名神璽至大業初著之于令隋末

又没于宇文化及竇建德武德四年克平東夏建德右僕射裴矩奉傳國璽及仲璽六璽以獻

三曰皇

帝行寶答䟽於王公則用之四曰皇帝之寶勞來勲賢

則用之五曰皇帝信寶徵召臣下則用之六曰天子行

寶答四夷書則用之七曰天子之寶慰撫蠻夷則用之

八曰天子信寶發蕃國兵則用之

衛宏漢舊儀曰天子有六璽皆白玉螭獸

紐文曰皇帝行璽皇帝之璽皇帝信璽天子行璽天子之璽天子信璽虞喜志林曰所封事異故文字不同漢儀又云以皇帝行璽為凡雜以皇帝之璽賜諸侯王書以皇帝信璽發兵其徵大臣以天子行璽外國事以天子之璽鬼神事以天子信璽皆以武都紫泥封青布囊白素束兩端縫尺一版中約署有事及發外國兵用天

予信璽封拜外國及徵召用天子行璽賜匈奴單于外國王書用天子之璽下竹使符徵召大事行州郡國者用皇帝信璽諸下銅獸符發郡國兵用皇帝之璽封拜王公以下遣使就授時用皇帝行璽若車駕行幸次直侍中佩信璽行璽以從天子之信古曰璽今曰寶其用以玉其封以泥皇后及太子之信曰寶其用以金也

凡大朝會則捧寶以進于御座車駕行幸則奉寶以從

于黃鉞之內

今元正朝會則進神寶及受命寶若行幸則合八寶為五舉函籙封盛以從

凡

國有大事則出納符節辨其左右之異藏其左而班其

右以合中外之契焉一曰銅魚符所以起軍旅易守長

兩京留守若諸州諸軍折衝府諸處捉兵鎮守之所及宮總監皆給銅魚符

二曰傳符所以

給郵驛通制命

兩京留守及諸州若行軍所並給傳符諸應給魚符及傳符者皆長官執之具

長官若被告謀反大逆其魚符三曰隨身魚符所以明付以次官無次官付受告之司

貴賤應徵召

親王及二品已上散官京官文武職事五品已上都督判吏大都督府長史司馬諸

都護副都護並給隨身魚符

四曰木契所以重鎮守慎出納

車駕巡幸皇太

子監國有兵馬受處分者為木契若王公以下兩京留守及諸州有兵馬受處分并行軍所及領兵五百人

以上馬五百疋以上征討亦各給木契具在外及行用法式並准魚符

五曰旌節

周禮掌儀職曰

凡邦國之使節山國用獸節土國用人節澤國用龍節皆金也又云道路用旌節注云今漢使所擁是也漢書曰戾太子遭巫蠱事不自明取漢使節發兵與丞相劉屈氂戰初漢節純赤以太子持赤節故更為黃旄加以

相別蘇武在白匈奴執漢節毛落並其事也

所以委良能假賞罰魚符之制王

畿之內左三右一王畿之外左五右一

左者在內右者在
外行用之日

從第一為首後事須用

大事魚勅書

替代留守軍將及
軍發後更添兵馬

以次發之周而復始

新授都督刺史及改替追喚別使若禁推請假勅許及別敕解任者皆須得勅書

小事但降符

函封追遣使合而行之

應用魚符行下者尚書省錄敕牒門下省奏請仍預遣官典就

門下對封封內連寫勅符與左魚同函封上用門下省印共追右符函盛封印亦准此

傳符之制

太子監國曰雙龍之符左右各十京都留守曰麟符左

二十其右一十有九東方曰青龍之符西方曰騶虞之符

南方曰朱雀之符北方曰玄武之符左四右三

左者進內右者

付外應執符人具兩京留守並進內若車駕巡幸留右符付留守人隨身魚符之制左二

右一太子以玉親王以金庶官以銅

隨身魚符皆題云某位姓名其官只

有一員者不須著姓名即官名其曹司同者雖一員亦著姓名隨身者仍著姓名並以袞盛其袋三品已上飾以金五品已上飾以銀六品以下守五品已上者不佩魚若在家非時及出使別教負檢校并領兵在外不別給符契若須迴改處分佩以為飾刻姓名者去官而納者勛符同然後承用

馬不刻者博而佩之

若傳佩魚皆須遞相付十日之內申報禮部

木契之制

太子監國則王畿之內左右各三王畿之外左右各五

庶官鎮守則左右各十旌節之制命大將帥及遣使於四方則請而假之旌以專賞節以專殺

弘文館學士無員數

後漢有東觀魏有崇文館宋元嘉有玄史兩館宋太始至齊永明有

總明館梁有士林館北齊有文林館後周有崇文館或
典校理或司撰著或兼訓生徒若今弘文館之任也武
德初置修文館武德未改為弘文館神龍元年避孝敬
皇帝諱改為昭文神龍二年又改為修文景雲二年改
為昭文開元七年又改為弘文隸門下省自武德貞觀
以來皆妙簡賢良為學士故事五品已上稱為學士六
品已下為直學士又有文學直館并所置學士並無員
數皆以他官兼之儀鳳中以館中多圖籍置詳正學士
校理自垂拱以來多大臣兼領館中有四部書貞觀初
儲無量檢校館務學士號為館主因為故事其後有張

太素劉偉之范履冰並特敕相次為
館主焉常令給事中一人判館事

學生三十人

補弘文崇文學生例皇宗總麻已上親皇
太后皇太后大功已上親散官一品中書

門下三品同中書門下平章事六尚書功臣食實封
者京官職事正三品供奉官三品子孫京官職事從三
品中書黃門侍郎子並聽預簡選性識聰敏者克貞觀
元年勅見任京官文武職事五品已上有性愛學書而
及有書性者聽於館內學書具法書內出其年有二十
四人入館敕虞世南歐陽詢教示楷法黃門侍郎王珪
奏學生學書之暇請置博士兼肄業焉敕太學助教侯
孝遵授其經典著作郎許敬宗授以史後二年珪入奏
請為學生置講經博士考試
經業准試貢舉兼學法書

校書郎二人從九品

本置名譽校掌校典籍開元七年
罷離校置校書四人二十三年減

二人

典書二人

館中有經史子集四部之書使典之也其職同流外八考入流

榻書手三人

貞觀二十三年置龍朔三年館內法書九百四十九卷並裝進其榻書停神龍元年

又置

筆匠三人

貞觀二十三年置

熟紙裝潢匠九人

貞觀二十三年置

弘文館學士掌詳正圖籍教授生徒凡朝廷有制度法

革禮儀輕重得參議焉

校書郎掌校理典籍刊正錯謬其學生教授考試如國

子之制

禮部試崇文弘文生舉例習經一大經一小經史習史記漢書後漢書三國志各自為業及試

時務策五條經史皆讀文精熟言音典正策試十道取粗解注義經通六史通三具時務策須文體不失問目意試五得三皆魚帖孝

經論語共十條者為第

唐六典卷八

欽定四庫全書

唐六典卷九

唐 張九齡等 撰

中書省

中書省

中書令二人

中書侍郎二人

中書舍人六人

主書四人

主事四人

令史二十五人

書令史五十人

傳制十人

亭長十八人

掌固二十四人

修補制敕匠五十人

掌函掌案各二十人

右散騎常侍二人

右補闕二人

右拾遺二人

起居舍人二人

通事舍人十六人

集賢殿書院

學士

直學士

侍講學士

修撰官

校理官

中使一人

乳目官一人

知書官八人

書直及寫御官一百人

搨書手六人

畫直八人

裝書直十四人

造筆直四人

典四人

集賢殿學士

史館

史官

亭長二人

掌固六人

熟紙匠六人

甄使院

知甄使一人

判官一人

典二人

中書令二人正三品

周官內使掌王之八柄掌書王命蓋中書之任也漢中書謁者令丞

屬少府自武帝游宴後庭故用宦者司馬遷被腐刑之後為中書令即其任也不言謁者省文也宣帝時任中

尚書官弘恭石顯皆宦者恭為令顯為僕射元帝即位恭歿顯代為中書令元帝以中人無外黨遂委以政事事無大小皆因決白貴幸傾朝公卿已下畏之重足并迹成帝改中書謁者令曰中謁者令罷中書宦官更以士人為之漢書儀云頒贊尚書出入奏事秩千石後漢省獻帝時魏武為魏王置秘書令典尚書奏事此又中書之任也魏黃初改秘書令典尚書奏事為中書令又置監與令各一人秩並千石以秘書左丞劉放為中書監右丞孫資為中書令二人用事權自此重矣魏置監書典尚書奏事若宓詔下州郡及邊將則不由尚書晉氏監令並第三品秩千石銅印墨綬進賢兩梁冠絳朝服佩水蒼玉輅車監令掌贊詔命記會時事典作文書舊尚書并掌詔奏既有中書官而詔悉由中書官也故荀勗從中書監為尚書令人賀之乃發志曰奪我鳳凰池何賀之有東晉朝更重其職多以諸公領之中興之

後以中書九任并入散騎省後復置之宋齊置監令品秩並同晉氏梁監增秩至中二千石令秩增二千石監令並增秩至二品後定十八班監班第十五令班第十四陳氏監令品秩依梁中書分爲二十一局各掌尚書諸曹總國機要而尚書唯聽受而已後魏置監令各一人孝文初定命中書監正第一品中書令正第二品中太和末監從第二品令正第三品北齊依魏後周依周官春官府置內史中大夫二人掌王言蓋比中書監令之任後又增爲上大夫隋氏改中書省爲內史省置內史省監令各一人尋廢監置令二人正第三品文帝廢三公府寮令中書令與侍中知政事遂爲宰相之職煬帝十二年改爲內書省武德初爲內史省三年改爲中書省龍朔二年改省爲西臺令爲右相咸亨元年復舊開光宅二年改中書爲鳳閣令爲內史神龍元年復舊開元元年改爲紫微令五年復舊

中書令之職掌軍國之政令緝熙帝載統和天人八則

告之出則奉之以釐萬邦以度百揆蓋以佐天子而執

大政者也凡王言之制有七一曰冊書

立后建嫡封樹藩屏寵命尊賢

臨軒備禮則用之

二曰制書

行大賞罰授大官爵釐革舊政赦宥降虜則用之

三曰慰

勞制書

褒贊賢能勸勉勤勞則用之

四曰發日敕

謂後晝發日敕也增減官員廢置州

縣徵發兵馬除免官爵授六品以下官處流已上罪用庫物五百段錢二百千倉糧五百石奴婢二十人馬五

十足牛五十頭羊五百口已上則用之

五曰敕旨

謂百司承旨而為程式奏事請施行者

六

曰論事敕書

慰諭公卿誠約臣下則用之

七曰敕牒

隨事承旨不易舊典則用之

皆宣署申覆而施行焉

尚書有典謨訓誥誓命之書皆帝王詔制記于簡策者也蔡邕

獨斷稱漢制天子之書一曰策書二曰制書三曰詔書四曰戒敕策者以簡爲之其制長三尺短者半之其次一長一短兩編下附篆書題年月日稱皇帝曰以命諸侯王三公制書帝者制度之命也其文曰制詔三公敕令贖令之屬是也近道印付使遠道皆置封尚書令即准敕贖令召三公詣朝堂受制書司徒露布州郡詔書有三品其文曰告某官某官如故事是爲詔書羣臣有所奏請尚書令奏下之有制詔天子答之曰可以爲詔書羣臣有所奏請無尚書令奏制曰之字則答曰已奏如書本官下所當至亦曰詔戒書戒敕刺史太守及三邊管官被敕文曰有詔敕某官是爲戒敕自魏晉以後因循有冊書詔敕總名曰詔皇朝因隋不改天后天授元年以避諱改詔爲制今冊書用簡制書勞慰制書發日敕用黃麻紙敕旨論事敕及敕牒用黃藤紙其敕書

頌下諸
州用絹

凡大祭祀羣神則從升壇以相禮享宗廟則從
升阼階親征纂嚴則使戒敕百寮冊命親賢臨軒則使
讀冊若命之于朝則宣而授之凡冊太子則授璽綬凡
制詔宣傳文章獻納皆授之於記事之官

中書侍郎二人正四品上

按環濟要略漢置中書掌密
詔有令僕丞郎漢舊儀云置

中書領尚書事掌勾奴營部一郎民曹一郎謁者一郎
魏黃初中書置監令又置通事郎次黃門郎即中書侍
郎之任也魏志明帝詔舉中書郎謂盧毓曰得人與否
在盧生耳又司思直王辟王伯與擢為中書侍郎則其
名起於魏氏晉令中書侍郎四人品第四給五時朝服
進賢一梁冠晉氏每一郎入直西省專掌詔草更直省

五日從駕則正直從次直守東晉又改為通事郎尋復舊宋齊並同晉氏梁功高者一人主直內事秩千石班第九陳依梁後魏置四人初正第四品上太和末從第四品上北齊因之後周依春官府置小內史下大夫二人蓋比中書侍郎之任也隋初改為內史省侍郎置四人正第四品下煬帝二年減二員十二年改為內書侍郎皇朝改為內史侍郎武德三年改為中書侍郎龍朔咸亨光宅神龍開元並隨省改復

中書侍郎掌貳令之職凡邦國之庶務朝廷之大政皆衆議焉凡臨軒冊命大臣令為之使則持冊書以授之若自內冊則以冊書授使者冊后則奉
凡四夷來朝臨踪璽及綬冊太子則奉璽皆以授使者
軒則授其表䟽升于西階而奏之若獻贄幣則受之以

授於所司

中書舍人六人正五品上

魏氏中書置通事一人掌呈奏案草魏志云明帝時有通

事劉泰是也高貴鄉公正始中改為通事舍人尋又改為通事侍郎則猶兼侍郎之任也晉書百官志云晉初中書舍人通事各一人至東晉合為一職謂之通事舍人專掌呈奏後復省之而以侍郎兼其職晉令中書通事舍人品第七絳朝服武冠宋初又置通事舍人四人品亦同晉氏入直閣內出宣詔命而侍郎之任輕矣齊武永明立中書通事舍人四人各住一省時謂之四戶既總重權勢傾天下會蔡惑人太微太史奏宜修祈禳之禮太尉王儉謂之曰天文乖忤此由四戶帝納之不

能改也而梁氏秩四百石品第八梁用人殊重簡以才能不限資地多以地官兼領並入閣內專掌中書詔詰猶魚呈奏之事故裴子野以中書侍郎鴻臚卿常魚中

書通事舍人別敕之詔詔自魏晉詔詔皆中書令及中書侍郎掌之至梁始舍人爲之其後除通事直曰中書舍人陳氏置五人餘同梁氏後魏第六品上史闕其員北齊置十人品同魏氏並掌詔詔後周春官府置小史上士二人此其任也隋初改曰內史舍人置八人專掌詔詔正第六品上開皇三年加從第五品上煬帝三年減置四人十二年改曰尚書舍人皇朝改曰內史舍人武德三年改曰中書舍人龍朔咸亨光宅神龍開元並改復隨省

中書舍人掌侍奉進奏參議表章凡詔旨制敕及軍書冊命皆按典故起草進畫既下則署而行之其禁有四
一曰漏洩二曰稽緩三曰違失四曰妄誤所以重王命

也制敕既行有誤則奏而改正之凡大朝會諸方起居則受其表狀而奏之國有大事若大克捷及大祥瑞百僚表賀亦如之凡冊命大臣于朝則使持節讀冊命命之凡將帥有功及有大賓客皆使以勞問之凡察天下冤滯與給事中及御史三司鞫其事凡有司奏議文武

考課皆預裁焉

按今中書舍人給事中每年各一人監考內外官使其中書舍人在省以年深

者為閣老魚判本省雜事一人專掌畫謂之知制誥得食政事之食餘俱分署制敕六人分押尚書六司凡有章表皆商量可否則與侍郎及令連署而進奏其掌畫事繁或以諸司官兼者謂之魚制誥

主書四人從七品上

周官天官有司書中士四人鄭注云主會計之簿書掌邦國六典以

法九職蓋此主書之任也王道秀百官春秋初晉中書置主書用武官宋文帝改用文吏齊氏尚書置主書令史梁氏不置陳氏中書置主書十人去令史之名後魏中書有主書令史八人從第七品上北齊十人從八品上天保中文宣躬親政事主書令史頗亦受委並得奏事文宣曾立看主書令史題署嫌其遲語云但主書何須復若令史二字也即以去之至武成河清初左丞劾其輒改吏稱皆云文宣口敕尋屬新令初頒遂去令史之字文宣之代雖曰委任用人猶輕至孝昭武成召引才學之士荀士遜李得林樊孝廉為之頗曰清舉猶未

有灼然子弟屈為此職隋氏中書主書亦有令史字置十人正第九品上用

人孟輕煬帝三年改減為四人皇朝因之流外入流累轉為之

主事四人從八品下

魏氏所置歷宋齊中書並置主事品並第八梁中書令史二人品第

八陳氏及後魏比齊並不置隋初諸臺省並置主事令史皆正第九品上煬帝三年並去令史之名前代用人皆輕而隋氏雜用士人為之故顏慈楚文學名家為內史主事並罷士人皇朝並用流外入流累轉為之舊令從九品上開元二十四年敕進入八品

令史二十五人書令史五十人

魏置中書令史品第八晉氏品第九宋氏品第

八齊中書令史品第六梁中書令史八人書令史十二人皆第九陳氏中書史不置令史後魏比齊中書並有令史自前代以來令史皆有品秩至隋開皇初始降為流外行署

右散騎常侍二人從三品

故事已詳於左省顯慶二年置龍朔二年改為右常侍咸

享元年
復故

右散騎常侍掌如左散騎常侍之職

右補闕二人從七品上
廢置已詳門下省左補闕注

右拾遺二人從八品上
已詳左拾遺注

右補闕拾遺掌如左補闕拾遺之職

起居舍人二人從六品上
起居舍人因起居注而名官焉古者人君言則右史書之

即其任也其設官沿革起居郎注詳焉隋煬帝三年減內史舍人四員置起居舍人二人從第六品上次內史舍人下始以虞世南蔡允恭為之皇朝因之貞觀二年省顯慶二年又置龍朔二年改為右史咸亨元年復故

天授元年又改為右
史神龍元年復故

起居舍人掌修紀言之史錄天子之制誥德音如記事

之制以紀時政之損益

自永徽以後起居唯得對仗承旨仗下之後謀議皆不得預聞

長壽元年文昌左丞姚璿知政事以為帝王謨訓不可遂無紀述若不宣自宰相史官無從得書遂表請仗下所言軍國政要即宰相一人專知撰錄號為時政記每月送史館自後因循錄付兩省起居使編錄焉

季

終則授之於國史

通事舍人十六人從六品上

通事舍人即秦之謁者漢書百官表云謁者掌賓贊

受事員七十人秩比六百石有僕射秩比千石舊儀云謁者有缺選郎中美黝晉大音者補後漢百官志和帝

時陳羣何熙為謁者僕射贊拜殿中音動左右後漢有
常侍謁者五人謁者三十五人二漢謁者臺並隸光祿
勳魏置謁者十人晉武帝省僕射以謁者并蘭臺晉初
置舍人通事各一人隸中書東晉令舍人通事兼謁者之
任通事舍人之名自此始也宋武帝置謁者僕射領謁
者十八人齊因之梁置謁者十人亦隸謁者臺陳亦有
之後魏謁者從第五品中北齊謁者三十人正第九品
下隋初罷謁者官置通事舍人十六人從六品上開皇
三年增舊為三十四員又置謁者臺改通事舍人為通
事謁者創置四方館於建國門外隸鴻臚寺以待四方
使者皇朝廢謁者臺改謁者為通事舍人掌朝見引納
及辭謝者於殿廷通奏京官文武職事五品已上假使
去皆奏辭來皆奏見其六品已
下奉勅差使亦如之外官五品已上假使至涼及
經京過若新授及駕行在三百里內過並聽辭見凡近

臣入侍文武就列則引以進退而告其拜起出入之節

凡四方通表華夷納貢皆受而進之

若有大詔令則承旨以宣示百寮

凡軍旅之出則受命慰勞而遣之既行則每月存問將士之家以視其疾苦凱還則郊迓之皆復命凡致仕之臣與邦之耆老時巡問亦如之

集賢殿書院

開元十三年所置漢魏以來其職具秘書省梁武帝於文德殿內列藏衆書北齊有

文林館學士後周有麟趾殿學士皆掌著述隋平陳之後寫書正副二本藏於宮中其餘以實秘書外閣煬帝於東都置觀文殿東西廂貯書自漢延熹至今皆秘書掌圖籍而禁中之書或時有焉及太宗在藩邸有秦府

學士十八人其後崇文館弘文館皆有學士則天時亦有殊英學士皆其任也今上即位大收羣書以廣儒術自開元五年於乾元殿東廊下寫四部書以充內庫乃令右散騎常侍褚無量秘書監馬懷素摠其事置刊定官四人以一人判事其後因之六年駕幸東京七年於麗正殿安置為修書使褚馬既卒元行冲為使尋以張說代之八年置校理二十人十二年駕幸東都於命婦院安置十三年召學士張說等宴於集德殿於是改名集賢殿修書所為集賢殿書院五品已上為學士六品已下為直學士以說為大學士知院事說累讓大字詔許之其後更置修撰校理官只有待制官名其來尚矣漢朱買臣待詔公車公車衛尉之屬官掌天下之上書東方朔劉向王褒賈誼之等待詔金馬門官署門也今之待制即其事焉

學士

五品以上為學士每以宰相為學士者知院事初張說為中書令知院制以右常侍徐堅副之自爾

常以近密官
為副兼判院

直學士

六品以下為直學士
並開元十三年置

侍講學士

開元初褚無量馬懷素侍講禁中為
侍讀其後康子元等為侍講學士

修撰官校理官

同直學士無常員以佗官兼之又
有留院官檢討官皆以學術別勅留之

中使一人

自乾元殿寫書則直知出
入宣傳進奏掌同官禁

孔目官一人

開元五
年置

知書官八人

開元五年置漢劉歆總羣書而為七畧凡
三萬三千九十卷遭王莽董卓之亂掃地

皆盡魏氏採掇遺亡至晉總括羣書凡二萬九千九百
四十五卷惠懷之後靡有孑遺東晉所存三千一十四

卷至宋謝靈運造四部目錄凡四千五百八十二卷其
後王儉復造目錄凡萬五千七十四卷齊王亮謝朓四
部書目凡萬八千一百一十卷齊末兵火延燒秘閣經籍煨
燼梁帝克平侯景收公私經籍歸于江陵凡七萬餘卷
周師入郢咸自焚之周武保定中書盈萬卷平齊所得
纔至五千隋秘書監牛弘請分遣使者搜訪異書平陳
之後經籍漸備凡三萬餘卷煬帝寫五十副本分為三
品大唐平王世充收其圖書汴河西上多有漂沒存者
猶八萬餘卷自是圖籍在秘書今秘書弘文史館司經
崇文皆有之集賢所寫皆御本也書有四部一曰甲為
經二曰乙為史三曰丙為子四曰丁為集故分為四庫
每庫二人知寫書出納名目次序以備檢討焉四庫之
書兩京各二本共二萬五千九百六十一卷皆以益州
麻紙寫其京庫書鈔白牙軸黃帶紅牙籤史庫書鈔青
牙軸縹帶綠牙籤子庫書鈔紫檀軸紫帶碧
牙籤集庫書鈔牙軸朱帶白牙籤以為分別

書直及寫御書一百人

開元三年十二月勅於秘書省昭文館兼廣召諸色能書者充

皆親經御簡後又取前資常選三衛散官五品以上子孫各有年限依資甄叙至十九年敕省官為直院也

搨書手六人

乾元殿初置二人開元十四年奏加至六人取人及有官同有院

書直八人

開元七年勅緣修雜圖訪取二人八年又加六人十九年院奏定為直院

裝書直十四人

開元六年置八人七年更加十人十九年八月減四人

造筆直四人

開元六年置

典四人

開元五年置二人九年加二人

集賢院學士掌刊緝古今之經籍以辨明邦國之大典

而倘顧問應對凡天下圖書之遺逸賢才之隱滯則承旨而徵求焉其有籌策之可施於時著述之可行於代者較其才藝考其學術而申表之凡承旨撰集文章校

理經籍月終則進課于內歲終則考最于外

開元八年十月敕學

士等入經三年已上為年深若校理精勤純繆多正及不能詳覈無所發明委修書使錄奏別加褒貶

史館史官

周有太史小史內史外史而諸侯之國亦置史官又春秋國語引周志及鄭書之說推尋

事迹以當時記事各有職司其後陵夷史官放絕秦滅先王之典其制莫存至漢武始置太史命司馬談為之時天下計書先上太史副上丞相談乃據左氏國語代本戰國策楚漢春秋接其後事成一家之言談卒其子

遷又爲太史嗣成其事名曰史記遷卒後好事者若馮
商劉歆揚雄等亦頗著述漢末扶風班彪綴後傳數十
篇彪卒其子固續成其志名曰漢書後漢明帝又召固
入東觀觀與陳宗尹敏孟異共成光武本紀其後劉珍劉
毅劉陶伏無忌黃景等相次著述東觀所撰書謂之東
觀漢記然皆佗官兼領史職至魏明帝太和中始置著
作郎及佐郎隸中書省專掌國史至晉惠帝元康二年
改隸秘書省歷宋齊梁陳後魏並置著作隸秘書省北
齊因之代亦謂之史閣亦謂之史館史閣史館之名自
此有也故北齊邢子才作詩酬魏收冬夜直史館是也
後周有著作上士中士掌國史隸春官府隋氏曰著作
曹掌國史隸秘書省皇朝曰著作局貞觀初別置史館
於禁中專掌國史以佗官兼
領或卑品有才亦以直館焉

史官掌修國史不虛美不隱惡直書其事凡天地日月

之祥山川封域之分昭穆繼代之序禮樂師旅之事誅
賞廢興之政皆本於起居注以為實錄然後立編年之
體為褒貶焉既終則藏之于府

匭使院知匭使一人

垂拱元年置常以諫議大夫及補
闕拾遺一人為使專知受狀以達

其事或要者當時處分餘出付中書及理匭使據
狀申奏理匭使常以御史中丞及侍御史一人為之

知匭使掌申天下之冤滯以達萬人之情狀立匭之制
一房四面各以方色東曰延恩懷材抱器希於聞達者
投之南曰招諫匡正補過裨於政理者投之西曰申冤

懷冤負屈無辜受刑者投之北曰通玄獻賦作頌諭以

大道及涉於玄象者投之

初置有四門其制稍大難於往來後遂小其制度同為一

匱依方色辨之

其匱出以辰前入以未後

唐六典卷九

欽定四庫全書

唐六典卷十

唐 張九齡等 撰

秘書省

秘書省

監一人

少監一人

丞一人

秘書郎四人

校書郎八人

正字四人

主事一人

令史四人

書令史九人

典書八人

楷書手八十人

亭長六人

掌固八人

熟紙匠十人

裝潢匠十人

筆匠六人

著作局

著作郎六人

著作佐郎四人

書令史一人

書史二人

校書郎二人

正字二人

楷書手五人

掌固四人

太史局

令二人

丞二人

令史二人

書令史四人

楷書手二人

亭長四人

掌固四人

司歷二人

保章正一人

歷生三十六人

裝書厯生五人

監候五人

天文觀生九十人

靈臺郎二人

天文生六十人

挈壺正二人

司辰十九人

刻漏典事十六人

漏刻博士九人

漏刻生三百六十人

典鐘二百八十人

典鼓一百六十人

秘書省監一人從三品

周禮春官太史掌建邦之六典又小史掌邦國之志定繫世又

外史掌四方之志三皇五帝之書並秘書之任也秦則博士官所職禁人藏書漢氏除挾書之律開獻書之路置寫書之官又令謁者陳農求遺書於天下故文籍往往而出並藏之書府在外則有太常太史博士掌之內則有延閣廣內石渠之藏又御史中丞在殿中掌蘭臺秘書圖籍又未央宮中有麒麟閣天祿閣亦尚書劉向

揚雄典校皆在禁中謂之中書猶今言內庫書也後漢則藏之東觀亦禁中也至桓帝延熹二年始置秘書監屬太常掌禁中圖書秘記故曰秘書漢官云秘書監一人秩六百石魏武為魏王置秘書令典尚書奏事即中書之任也魚掌圖籍秘記文帝黃初中分秘書立中書因置監令乃以散騎常侍王象領秘書監撰皇覽魏氏蘭臺亦藏書御史掌焉魏畧薛夏云蘭臺為外臺秘書為內閣是也魏初秘書屬少府及王肅為監以為秘書之職即漢東觀之任安可復屬少府自此之後不復屬焉至晉武又以秘書并入中書惠帝永平元年詔秘書典綜經籍考校古今中書自有職務遠相統攝於事不專宜令復別置秘書寺掌中外三閣圖書自是秘書寺始外置焉晉令云品第五絳朝服銅印墨綬進賢兩梁冠佩水蒼玉宋齊同晉氏梁改為省與尚書中書門下集書為五省秘書監增秩中二十石品第三後制十八班秘書監班第十一陳依梁後魏亦以秘書為五省之

數監初從第二品中太和末正第三品北齊依魏後周
春官府置外史下大夫掌書籍此秘書監之任也隋秘
書與尚書門下內史殿中為五省秘書監正第三品煬
帝三年降為從第三品其後又改秘書監為秘書令武
德初改為監龍朔二年改為蘭臺其監曰蘭臺太史咸
亨元年復舊天授初改為麟臺監神龍元年復舊初漢
御史中丞掌蘭臺秘書圖籍故歷代
置鄱邑建臺省以秘書與御史為鄱

少監二人從四品上

隋煬帝三年置秘書少監一人從
四品掌貳秘書監之職其後又改

為少令皇朝因隋為少監龍朔二年改為蘭臺侍郎咸
亨元年復舊天授初改為麟臺少監神龍初復舊至太
極初又
增一員

丞一人從五品上

漢獻帝建安中魏武為魏王置秘書
令及二丞典尚書奏事並中書之任

也魏志劉劭建安末自秘書郎轉秘書丞是也魏文黃
初中分秘書立中書以秘書左丞劉放為中書監秘書
右丞孫資為中書令而秘書置丞一人秩四百石魏志
云何禎文帝時上許都賦帝異之公車徵到為秘書郎
後月餘禎闕事帝問外言本用禎為丞何故為郎案主
者罪遂改為丞時秘書丞尚未轉遂以禎為右丞晉武
并秘書入中書謂之中書秘書丞惠帝又置秘書丞二
人晉令秘書丞品第六銅印墨綬進賢一梁冠絳朝服
晉書稱桓石綬為秘書丞啓校四部圖書宋齊並一人
品服同晉氏梁增品第五秩六百石銅印黃綬陳依梁
後魏秘書丞一人正第五品上北齊因之後周春官府
有小外史上士之職蓋此秘書丞之任也隋秘書丞一
人正五品秘書監之職掌邦國經籍圖書之事有二局一曰
著作二曰太史皆率其屬而修其職

凡四部之書必立
三本曰正本副本

貯本以供進內及賜人凡敕賜人書秘書無本皆別寫給之

少監為之貳馬丞掌判

省事

秘書郎四人從六品上

魏武置秘書郎秩四百石魏起居注青龍中議秘書丞郎職近

日月宜居三臺上亞尚書丞郎魏志云王伯與鍾會何禎鄭默竝起家拜秘書郎中而默在秘書掌中外三閭刪省繁文除其浮穢始制中經時虞松為中書令謂默曰而今而後朱紫別矣晉令秘書郎中品第六進賢一梁冠絳朝服晉起居注云武帝遣秘書圖書分為甲乙景丁四部使秘書郎中四人各掌一焉晉書云左太冲為三都賦自以所見不博求為秘書郎中宋氏除中字宋書稱王敬弘子恢之名為秘書郎敬弘求為奉朝請與恢之書曰且秘書有限故有競朝請無限故無競吾欲使汝處無競之地文帝喜而許之齊書稱王僧虔王

慈竝早有令譽皆起家拜秘書郎梁秩六百石江左多
任責游年少而梁代尤甚當時諺言上車不落則著作
體中何如則秘書陳著令僕射子起家為之後魏亦
置四人正第七品上後魏書云高謐天安中以功臣子
召入禁中專掌秘閣拜秘書郎奏請廣訪羣書大家繕
寫北京圖籍稍以審正北齊又增中字正第七品下隋
又除中字正七品上煬帝三年加為從五品皇
朝為從第六品上龍朔天授神龍並隨省改復

校書郎八人正九品上

漢成帝命光祿大夫劉向於天
祿閣校經傳諸子詩賦步兵校

尉任宏校兵書太史令尹咸校數術太醫監李柱國校
方術其後楊雄以大夫亦興校於天祿閣斯皆有其任
而未至其官至後漢始於東觀置校書郎中續後漢書
云馬融安帝時為大將軍鄧騭所召拜校書郎中在東
觀十年窮覽典籍上廣成頌又竇章居貧蔬食講讀不
懈太僕鄧康重章學行是時學者稱東觀為老氏藏室

道家蓬萊山康薦章入東觀為校書郎中漢御史中丞掌殿中蘭臺秘書圖籍因置蘭臺令史典校其書班固傳毅初竝為蘭臺令史王充云通人官蘭臺令史比校書郎中東觀有校書郎置校書郎中典其事時通儒達學亦多以佗官領之自漢魏歷宋齊梁陳博學之士往往以佗官典校秘書至後魏秘書省始置校書郎正第九品上北齊置十三人隋初亦置十二人煬帝三年減為十人其後又增為四十人皇朝減為八人

正字四人正九品下

掌詳定典籍正其文字前代才學之士多以佗官兼其任者齊秘書

省有正書蓋是正字之任北齊秘書省始置正字四人從第九品上隋因之皇朝為正第九品下

主事一人從九品上

皇朝置掌印并句檢稽失

令史四人書令史九人

魏甲辰儀秘書令史品第八晉品第九宋品第八齊秘書令史

品熟位第六梁陳品第九後魏秘書令史從第九品下
北齊正第九品上隋開皇初始降為流外行置隋秘書
令史四人流外二品書令史
九人流外三品皇朝因之

典書八人

齊職儀云宋孝武大明年開府儀同及三公
府皇子府皆有典書史皇朝秘書省始置典

書其職同流外
入考入流焉

楷書手八十人

隋煬帝秘書省置楷書員二十人從第
九品掌鈔寫御書皇朝所置職同流外

也

亭長六人掌固八人熟紙匠裝潢匠各十人筆匠六人

皇朝
所定

秘書郎掌四部之圖籍分庫以藏之以甲乙景丁為之

部目甲部為經其類有十一曰易以紀陰陽變化

經籍志歸

藏等六十九部
五百五十一卷

二曰書以紀帝王遺範

古文尚書等三十二部二百三

十七卷三曰詩以紀興衰誦嘆

韓詩等三十九部
四百三十三卷

四曰禮

以紀文物體制

周官等一百三十六部
一千六百二十二卷

五曰樂以紀聲

容律度

樂大義等三十二部
一百四十三卷

六曰春秋以紀行事褒貶

春秋

經等三傳九十七部
九百八十三卷

七曰孝經以紀天經地義

古今孝經等十八部

六十八曰論語以紀先聖微言

論語等并三經異義七
十二部七百八十一卷

九曰圖緯以紀六經讖候

河圖等十三部九十二卷

十曰小學以紀

字體聲韻

說文等三部四十六卷

乙部為史其類一十有三一曰

正史以紀紀傳表志

史記等六十七部三千八十三卷

二曰古史以紀

編年繫事

紀年等四十四部六百六十六卷

三曰雜史以紀異體雜記

周書等七十部九百一十七卷

四曰霸史以紀偽朝國史

趙書等二十部三百三

十五卷五曰起居注以紀人君動止

穆天子傳等四十一部一千一百八十九

卷六曰舊事以紀朝廷政令

漢武故事等二十部四百四卷

七曰職官

以紀班序品秩

漢官解詁等二十部三百三十六卷

八曰儀注以紀吉凶

行事

漢舊儀等五十九卷
部二千二十九卷

九曰刑法以紀律令格式

律令等三

十五部七百一十二卷

十曰雜傳以紀先賢人物

三輔決錄等二百一十七部一

千二百八十六卷

十一曰地理以紀山川郡國

山海經等一百三十九部一千

四百三十三卷

十二曰譜系以紀氏族繼序

世本等四十一部三百六十卷

三曰畧錄以紀史策條目

七畧等三十部二百一十四卷

景部為子其

類一十有四一曰儒家以紀仁義教化

晏子等三十五部三百三十六

卷二曰道家以紀清淨無為

鶡子等四十二部三百三十一卷

三曰法

家以紀刑法典制

申子等四部凡六十卷

四曰名家以紀循名責

實

管子等六部
七十二卷

五曰墨家以紀強本節用

墨子等三
部七十卷六

曰從橫家以紀辨說譎詐

鬼谷子等
二部七卷

七曰雜家以紀兼

敘衆說

尉繚子等九十七
部二十七卷

八曰農家以紀播植種藝

汜勝之書等五
部一十九卷

九曰小說家以紀芻辭輿誦

燕丹子等
二十五部

一百二
十二卷

十曰兵法以紀權謀制變

司馬兵法等一百四
部四百四十六卷

十一曰天文以紀星辰象緯

周髀等九十七
部六百七十卷

十二曰歷

數以紀推步氣朔

四分曆等一百部
二百六十三卷

十三曰五行以紀

卜筮占候

風角占等二百七十
部一千二十二卷

十四曰醫方以紀藥餌

鍼灸

黃帝素問等五十
六部四百一十卷

丁部爲集其類有三一曰楚詞

以紀騷人怨刺

楚詞等十部
二十九卷

二曰別集以紀詞賦雜論

荀況集等四百三十七
部四十三百八十一卷

三曰總集以紀類分文章

文章
流別

集等一百七部二
千二百一十三卷

校書郎正字掌讎校典籍刊正文字

字體有五一日古文廢而不用二曰大篆惟於石經載
之三曰小篆謂印璽旒旒碑碣所用四曰八分謂石經
碑碣所用五曰隸書典籍
表奏及公私文疏所用皆辨其紕繆以正四庫之圖

史馬

著作局著作郎二人從五品上

續漢書稱班固傳授以
蘭臺令史陳宗以洛陽

令尹敏以長陵令孟輩以司隸校尉並著作東觀然皆
佗官兼著作之名而未正其官至魏明帝太和中置著
作郎隸中書省晉惠帝元康二年詔曰著作舊屬中書
而秘書既別典文籍今改中書著作為秘書著作後又
別自名省曰著作省而猶隸秘書晉魏著作郎一人俗
謂之大著作專掌史註亦或為兼官晉令著作郎品第
六進賢一梁冠絳朝服而晉書稱陳壽作益都耆舊傳
武帝善之以為著作郎張載作劍閣銘世祖以為能除
著作郎孫楚自著作佐郎轉著作郎此皆謂大著作也
又荀勗以中書監于賁虞預徐廣以散騎常侍孫綽以
給事中伏滔以游擊將軍孫盛以秘書監並兼領著作
又陳郡王隱待詔著作單衣介憤朝朔望於著作省亦
其任也宋齊並同晉氏宋書云何承天除著作郎撰國
史承天已老諸佐郎並名家年少荀伯子朝之常呼為
奶母焉著作秩六百石品第六陳依梁後魏正第五品
上後魏書崔浩學究精微宋欽好學不倦並為著作郎

北齊二人從五品後周春官府置著作上士二人即其
職也隋秘書省領著作郎曹置著作郎二人從第五品
上煬帝三年增為正五品其後又降為從第五品皇朝
秘書省領著作局置著作郎二人龍朔二年改為司文
郎中咸亨
元年復故

著作佐郎四人從六品上

著作佐郎修國史宋百官春
秋云常道鄉公咸熙百官名

有著作佐郎三人晉定員八人哀帝興寧二年大司馬
桓溫表省四人孝武帝寧康元年復置八人晉令著作
佐郎品第六進賢一梁冠絳朝服孝武太元四年詔秘
書監自選著作佐郎令並無監使吏部選有監復舊馬
宋齊並同晉制著作佐郎始到職必撰名臣傳一人宋
氏之初國朝始建未有合撰者此制遂替矣梁秩四百
石品第七陳令僕射子起家為之品制同梁後魏正第
七品上北齊正第七品下後周春官府署著作中士四

人即著作佐郎之任也隋置八人正第七品上煬帝三年著作二人增品從第六皇朝置四人龍朔二年改為司文郎咸亨元年復故開元二十六年減置二人

書令史一人

自晉以來秘書著作皆有令史史闕其員品

校書郎二人正九品上

後魏著作省置校書郎史闕其員品北齊著作省置校書郎二

人正第九品上隋及皇朝因之開元二十六年減置一人

正字二人正九品下

隋著作省置正字二人從九品上皇朝因之

著作郎掌修撰碑誌祝文祭文與佐郎分判局事

太史局令二人從五品下

左傳云昔少昊氏以鳥紀官鳳鳥氏歷正也顓頊命南正

重司天北正黎司地唐虞之際羲氏和氏紹重黎之後
掌天地四時之官並太史之任也周官太史掌建邦之
六典正歲年以序事班告朔下邦國左傳曰天子有日
官即太史也漢書百官表太史局太常茂陵書稱司馬
談為太史令後漢太史令一人秩六百石掌天時星律
祥瑞妖災凡歲將終奏新年歷而已魏因之晉太史令
品第七秩六百石銅印墨綬進賢一梁冠絳朝服江左
高瑩以待中陳卓以義熙守吳道欣以殿中侍御史兼
領太史宋齊梁陳並同晉氏後魏北齊亦然後周春官
府置太史中大夫一人掌歷家之法隋秘書省太史曹
置太史令二人從七品上煬帝三年改太史曹為太史
監進令階為從五品皇朝因之改監為局龍朔二年改
為秘書閣局令改為秘書閣郎中咸亨元年復舊貞觀元
年為渾天監不隸麟臺其令監署一人加至正第五品
上因加副監及丞主簿府史等員其年又改為渾儀監
長安二年復為太史局還隸麟臺緣監置官及府史等

並廢其監依舊為令置二人景龍二年又改太史局為太史監令名不改不隸秘書開元二年又改令為監三年加從第四品下其一員改為少監十四年又改為局復為太史令二員隸秘書

丞二人從七品下

司馬彪續漢志云太史丞一人秩二百石魏晉宋齊皆同漢氏梁氏太史

丞三品勲位後魏北齊史失其品第隋太史丞置二人正第九品上煬帝三年減一人皇朝不置丞貞觀元年改為渾儀監始置丞二人從第七品上長安二年又省景龍二年復置

令史二人書令史四人

太史不隸秘書即為府史開元十四年復為令史也

太史令掌觀察天文稽定歷數凡日月星辰之變風雲

氣色之異率其屬而占候焉其屬有司歷靈臺郎挈壺

正凡玄象器物天文圖書苟非其任不得與焉

觀生不得讀占

書所見徵祥災異密封聞奏漏泄有刑

每季錄所見災祥送門下中書省

入起居注歲終總錄封送史館每年預造來歲歷頒于天下

司歷二人從九品上

漢官儀太史令員有典歷四人宋齊

梁陳後魏北齊皆有典歷並史闕其員品至隋改典歷為司歷置二人從九品下取左傳司歷為名皇朝為從

上九品

保章正一人從八品上

周禮春官太史屬有保章氏掌天星以志星辰日月之變動辯

其吉凶自秦漢以來無其職至後周春官府置太史其屬有保章上士中士之職即其任也至隋置歷博士一人正九品上皇朝因之長安四年省歷博士置保章正以當之掌教歷生

歷生三十六人

隋氏置掌習歷皇朝因之同流外八考入流

裝書歷生五人

皇朝置同歷生

司歷掌國之歷法造歷以頒于四方有戊寅歷

武德初東那道

士傳仁均所造拜太史令

麟德歷

麟德中太史令李淳風所造

神龍歷

神龍中太史令南宮

說所造

大衍歷

開元十四年嵩山僧一行奉制旨而考定最為詳密今見行焉

凡天下測

影之處分至表準其詳可載故參考星度稽驗畧影各

有典常

南至之影京兆長一丈二尺九寸二分蔚州長一丈五尺八寸九分春分中影洛城長五尺二

寸五分京兆長五尺三寸四分太原長六尺蔚州長六尺四寸四分半北至之影京兆表北長一尺四寸二分

安南則表南三寸開元十二年於京麗正院定表樣并審尺寸差太史官馳驛分往測候

監候五人從九品下

魏晉太史令史員有望候郎二十人候部吏十五人掌候天文並監

候之仕也隋初置監候四人從九品下煬帝三年增監候為十人皇朝因隋置監候五人

天文觀生九十人

隋氏置掌晝夜在靈臺伺候天文氣色皇朝所置從天文生轉補八考入

也流

靈臺郎二人正八品下

掌習知天文周文王受命而作邑于豐立靈臺所以觀祲象察

氣之妖祥也詩云經始靈臺鄭玄曰觀臺而曰靈者言文王化行似神之精明故以名也春秋傳曰公既視朔遂登靈臺以望而書雲物亦其制也其在周官則馮相氏登高臺以掌其事漢則雜候上林清臺後漢又作靈臺掌候日月氣而屬太史太史有二丞其一在靈臺漢官云靈臺員使十三人靈臺待詔四十六人魏太史有靈臺令丞主候望頒歷晉宋齊梁陳太史皆有靈臺丞隋太史置天文博士掌教習天文氣色皇朝因隋置天文博士二人正八品下長安四年省天文博士之職置靈臺郎以當之

天文生六十人

隋氏置皇朝因之年深者轉補天文觀生

靈臺郎掌觀天文之變而占候之凡二十八宿分為十

二次寅為析木燕之分

自尾十度至斗十一度

卯為大火宋之分

自氏五度 辰為壽星鄭之分 自軫十二度 巳為鶉尾楚

至尾九度 之分 自張十五度 午為鶉火周之分 自柳九度 未為

鶉首秦之分 自井十六度 申為實沈魏之分 自畢十二度

五酉為大梁晉之分 自胃七度 戌為降婁魯之分 自奎

五度至 亥為娵訾衛之分 自危十六度 子為玄枵齊之

分 自女八度 丑為星紀吳越之分 自斗十二度 所以

辯日月之纏次正星辰之分野凡占天文變異日月薄

蝕五星陵犯有石氏甘氏巫咸三家中外官占凡瑞星

祆星瑞氣祆氣有諸家雜占凡測候晷度則以游儀為其準

挈壺正二人從八品下

掌知漏刻周禮有夏官挈壺氏秋官司寤氏春官雞人氏凡三

職咸掌其事自漢以後太史掌之皇朝長安四年始置

司辰十九人正九品下

掌漏刻事隋置司辰二人從第九品下煬帝改為司辰師本屬

武侯府大業三年隸於太史局皇朝因之貞觀元年除師字

漏刻典事十六人

皇朝置掌司漏刻之節

漏刻博士六人

隋置有品秩掌教漏刻生皇朝降為流外也

漏刻生三百六十人

隋置掌習漏刻之節以時唱漏皇朝因之皆中小男為之轉補為典

鐘典

典鐘二百八十人

皇朝置掌擊漏鐘

典鼓一百六十人

皇朝置擊漏鼓


挈壺正司辰掌知漏刻孔壺為漏浮箭為刻以考中星

昏明之候焉

箭有四十八晝夜共百刻冬至夏之間有長短冬至日南為發去極一百一十五度晝

漏四十刻夜漏六十刻夏至日北為斂去極六十七度晝漏六十刻夜漏四十刻春秋二分發斂中去極九十度一度晝夜各五十刻秋分已後減晝九日減一刻二至前後則加減遲春分已後減晝九日減一刻

用日多二分之間則加減速用日少几候夜漏以為更
點之節每夜分為五更每更分為五點更以擊鼓為節
點以擊
鐘為節



唐六典卷十

欽定四庫全書

史部
唐六典卷十一

詳校官監察御史_臣劉芬

編修_臣程嘉謨覆勘

總校官庶吉士_臣倉聖脉

校對官檢討_臣龔大萬

謄錄監生_臣張子誠

欽定四庫全書

唐六典卷十一

唐

張九齡等撰

殿中省

殿中省

監一人

少監二人

丞二人

主事二人

令史四人

書令史十二人

亭長八人

掌固八人

尚食局

奉御二人

直長五人

書令史二人

書史四人

食醫八人

主食十六人

主膳七百人

掌固八人

尚藥局

奉御二人

直長四人

書令史二人

書史四人

侍御醫四人

主藥十二人

藥童三十人

司醫四人

醫佐八人

按摩師四人

呪禁師四人

合口脂匠二人

掌固四人

尚衣局

奉御二人

直長四人

書令史三人

書史四人

主衣十六人

掌固四人

尚舍局

奉御二人

直長六人

書令史三人

書史七人

掌固十人

幕士八千人

尚乘局

奉御四人

直長十人

書令史六人

書史十四人

奉乘十八人

習馭五百人

掌閑五千人

進馬六人

司庫一人

司廩二人

典事五人

獸醫七十人

掌固四人

尚輦局

奉御二人

直長四人

書令史二人

書史四人

掌扇六十人

掌翰三十人

掌輦二人

主輦四十二人

奉輦十五人

掌固六人

殿中省監一人從三品

魏氏初置殿中監品第七晉宋因之齊有內殿中監八人外殿

中監八人梁初位不登七班者別署勳位勳位殿中外監為三品勳位內監為三品勳位陳因之然其官甚微後魏殿中監從五品下北齊門下省屬官有殿中監四人掌駕前奉引行事東耕則進來紹隋改為殿內局監二人品正第六下大業三年分門下省尚食尚藥御府殿內等局分太僕寺車府驛驢等署置殿內省監正四品少監從四品丞從五品各一人掌諸供奉又有奉車都尉十二人掌進御與馬統尚食尚藥尚舍尚衣尚乘尚輦等六局皇朝因改曰殿中省龍朔二年改為中御府監為中御大監咸亨元年復舊

少監二人從四品上

隋煬帝置一人從四品皇朝加至二人龍朔咸亨隨省改復

丞二人從五品上

隋煬帝置一人從五品皇朝加至二人龍朔二年改為中御大夫咸亨元

年復故

主事二人從九品上

隋煬帝置皇朝因之

殿中監掌乘輿服御之政令總尚食尚藥尚衣尚乘尚

舍尚輦六局之官屬

舊屬官又有天藏府開元二十三年省

備其禮物而

供其職事少監為之貳凡聽朝則率其屬執繖扇以列於左右凡大祭祀則進大珪鎮珪於壇門之外既事受

而藏之凡行幸則侍奉於仗內若遊燕田閱則駢乘以

從馬

今內別置閑廐使其務多分殿中及太僕之事至於輿輦車馬則使掌其內監知其外遊燕侍奉皆

不與馬

若元正冬至大朝會則跪而進爵若和合御藥則

監視而嘗之

丞掌判監事兼勾檢稽失省署抄目

主事掌印及知受事發辰

尚食局奉御二人正五品下

周禮有膳夫內饔餼置六尚有尚食之名如淳以為

主天子物曰尚漢因之後遂省并其職於太官湯官至北齊門下省統六局尚食局有典御二人丞監各四人

又有集書省統三局有中尚食局典御二人監四人品與尚食同後周有內膳上士二人中士四人凡進食必先嘗之至隋開皇初門下省統尚食局有典御二人直長四人食醫四人大業三年分屬殿內改典御為奉御員二人正五品上皇朝因之龍朔二年改為奉膳大夫咸亨元年復故

直長五人正七品上

隋開皇初置直長四人從七品下大業三年加置六人增品為正第

七上皇朝因之減置五人

食醫八人正九品下

周禮有食醫中士二人掌和王之六食六飲六膳百羞百醬八珍之

齊隋尚食局有食醫皇朝加至八人後周置主食主膳等皇朝因之

主食十六人

後周內膳有主食十二人

尚食奉御掌供天子之常膳隨四時之禁適五味之宜

春肝夏心秋肺冬腎四季之月脾皆時王不可食五味酸醎甘苦辛

當進食必先嘗凡天

下諸州進甘滋珍異皆辨其名數而謹其儲供直長為之貳凡元正冬至大朝會饗百官與光祿視其品秩分其等差而供焉其賜王公已下及外方賓客亦如之若諸陵月享則於陵所視膳而獻之

諸陵須上食陵別殿中省主膳三十人分

番上下每季差官相監於陵所造食供進

食醫掌和齊所宜

主食掌率主膳以供其職

尚藥局奉御二人正五品下

自陳梁後魏已往皆太醫兼其職北齊門下省統尚

藥局有典御二人侍御師四人尚藥監四人惣御藥之事又集書省統三局有中尚藥局典御二人丞二人中謁者僕射二人惣知中宮醫藥之事隋門下省統尚藥局典御二人正五品下侍御醫四人正七品上直長四人正七品下醫師四十人大業三年分屬殿內改為奉御皇朝因之龍朔二年改為奉醫大夫咸亨元年復舊

直長四人正七品上

隋置四人正七品下煬帝加品為正七品上皇朝因之

侍御醫四人從六品上

北齊尚藥局有侍御師四人皇朝因之

主藥十二人藥童三十人

漢有藥丞主藥後周有主藥六人隋有主藥四人藥童二

十四人

司醫四人正八品下

隋大業中置
皇朝因之

醫佐八人正九品下

隋大業中置
皇朝因之

按摩師四人

隋有按摩師一百
二十人皇朝減置

咒禁師四人

皇朝
初置

合口脂匠二人

皇朝
初置

尚藥奉御掌合和御藥及診候之事直長為之貳凡藥

有上中下之三品

上藥為君養命以應天中藥為臣養
性以應人下藥為佐療病以應地遞

相宣攝
而為用

凡合藥宜用一君三臣九佐方家之大經也必
辨其五味三性七情然後為和劑之節五味謂酸鹹甘
苦辛酸屬肝鹹屬腎甘屬脾苦屬心辛屬肺三性謂寒
溫平七情謂有單行者有相須者有相使者有相畏者
有相惡者有相反者有相殺者其用又有四焉曰湯丸
膏散視其病之深淺所在而服之診脉辨寸關尺之三
部以調四時沉浮滑澁之節而知病之所在在胃膈者
先食而後服藥在心腹者先服藥而後食凡合和御藥

與殿中監視其分劑藥成先嘗而進焉

合藥供御門下中書司別長官

一人并當上大將軍衛別一人與殿中監尚藥奉御等監視藥成醫佐以上先嘗然後封印寫本方方後具注年月日監藥者徧署名俱奏餌藥之日尚藥奉御先嘗次殿中監嘗次皇太子嘗然後進御

侍御醫掌診候調和

司醫醫佐掌分療衆疾

主藥藥童掌刮削擣節

按摩師咒禁師所掌如太醫之職

尚衣局奉御二人從五品上

周禮有司服中士二人掌王吉凶衣服辨其名物與

其用事戰國有尚衣尚冠之職秦漢少府屬官有御府令丞掌供御服後漢有掌冠者典官婢作中衣服及補浣之事魏因之晉屬光祿勳東晉省宋大明中改尚方曰左右御府各置令丞一人後廢帝初省御府置中署隸右尚方其後又置至齊高祖省文帝又置初宋氏用三品勳位明帝改用二品準南臺御史掌金銀綵帛凡諸造作以供奉及妃主六宮梁陳無御府其職隸在尚方後魏有掌服郎從六品上北齊門下省統主衣局都統子統各二人後周有司服上士二人中士二人隋門下省有御府局監二人大業三年分屬殿內省其後又改為尚衣局皇朝因之龍朔二年改為奉冕大夫咸亨元年復舊

直長四人正七品下

隋改御府為尚衣局始置直長領主衣皇朝因之

主衣十六人

隋置皇朝因之

尚衣奉御掌供天子衣服詳其制度辨其名數而供其
進御直長為之貳凡天子冕服十有三一曰大裘冕二
曰衮冕三曰鷩冕四曰毳冕五曰絺冕六曰玄冕七曰
通天冠八曰武弁九曰弁服十曰黑介幘十一曰白紗
帽十二曰平巾幘十三曰翼善冠大裘冕無旒冕廣八
寸長一尺六寸

玄表纏衮以
下廣狹准此

金飾玉簪導以組為纓色

如其綬表以黑羔皮為之玄領青標緣朱裳白紗中單

皐領青標襍裾革帶玉鈎躒大帶

素帶朱裏紕其外上
以朱下以綠組約用

組

韞

韞蔽膝也凡韞皆隨裳色

鹿盧玉具劍火珠鏢首白玉雙佩玄

組雙大綬六綵玄黃赤白縹綠繩玄質長二丈四尺五

寸首廣一尺

小雙綬長二尺六寸色同大綬而首半之間施三玉環

朱韞赤舄祀

天神地祇則服之

袞冕垂白珠十有二旒以組為纓色如其綬黻纁克耳

玉簪導玄衣纁裳十二章

八章在衣日月星辰山龍華蟲大宗彝其四章在裳藻粉

米黼蔽衣標領為昇龍皆織成為之

山龍以下每章一行重以為等每行

十二白紗中單黼領青標襜褕韞革帶大帶劍玉珮綬

韞與上同舄加金飾享廟謁廟及廟遣上將征還飲至踐祚加元服納后若元日受朝及臨軒冊拜王公則服之

鷩冕服七章

三章在衣華蟲火宗彝四章在裳藻粉米黼黻

餘同衮冕有事遠

主則服之

毳冕服五章

三章在衣宗彝藻粉米二章在裳黼黻

餘同鷩冕祭海嶽則

服之

絺冕服三章

一章在衣粉米二章在裳黼黻

餘同毳冕祭社稷帝社則

服之

玄冕服

衣無章裳
刺黻一章

餘同絺冕蜡祭百神朝日夕月則服

之

通天冠加金博山附蟬十二首施朱翠黑介幘髮纓翠

綏玉若犀簪導絳紗袍白紗中單朱領襖白裙襦

亦裙衫

絳紗蔽膝白假帶方心曲領其革帶劍珮綬與上同白

韞黑舄若未加元服則雙童髻空頂黑介幘雙玉導加

寶飾諸祭還及冬至受朝元會冬會則服之

武弁金附蟬平巾幘

餘同其服

講武出征四時蒐狩大射禡

類宜賞祖罰社纂嚴則服之

弁服

弁以鹿皮為之

十有二珎

珎以白玉珠為之

玉簪導絳紗衣素裳

革帶白玉雙珮鞶囊小綬白韞烏皮履朔日則服之

黑介冑白紗單衣白裙襦革帶素韞烏皮履拜陵則服

之

白紗帽

亦烏紗

白裙襦白襪烏皮履視朝聽訟及燕見賓

客則服之

平巾幘

金寶飾

導簪冠支皆以玉紫褶

亦白褶

白袴玉具裝

真珠寶鈿帶箸鞞乘馬則服之

翼善冠其常服及白練裙襦通著之若服袴褶則與平

巾幘通著

已上並右服有事及見賓客則服之自隋文帝制柘黃袍及巾帶以聽朝至今遂以為常

凡天子之大圭曰琕長三尺鎮圭長尺有二寸有事于

郊廟社稷則出之于內將享至于中趙門則奉鎮圭于

監而進既事復受而藏之凡大朝會則設御案朝畢而

徹焉

尚舍局奉御二人從五品

周禮有掌舍掌行所解止之處惟幕幄帶之事漢少府屬

官有守宮令丞掌宮殿陳設魏殿中監掌帳設監護之事晉宋已下其職並在殿中監隋煬帝置殿內監改殿內局為尚舍局置奉御二人正五品皇朝因之龍朔二年改為奉宸大夫咸亨元年復舊

直長六人正七品下

隋煬帝置八人皇朝減二人

幕士八千人

皇朝置掌供御及殿中雜張設之事

尚舍奉御掌殿庭張設供其湯沐而潔其灑掃直長為

之貳凡大駕行幸預設三部帳幕有古帳大帳次帳小

次帳小帳凡五等古帳八十連

高二丈縱廣二丈五尺前有五梁後有七梁

大帳六十連

高一丈五尺縱廣二丈前有四梁

次帳四十連

高一丈三尺縱廣一丈二尺

大五尺前有三梁三帳皆朱蠟骨緋紬綾浮游覆之

小次帳三十連

高一丈一尺縱廣一丈二尺

尺小帳二十連

高八尺縱廣九尺

凡五等之帳各三是為三部

帳皆烏氈為表朱綾為覆下有紫幃方座金銅行床垂以簾其諸帳內外又設六柱四柱三柱為垣牆之制皆青純為表朱帛為裏其外置排城以為蔽捍焉

排城連版為之每版皆畫辟邪猛獸

表裏漆之凡供湯沐先視其潔清芳香適其寒溫而進焉凡

大祭祀有事於郊壇則先設行宮於壇之東南向隨地之宜將祀三日則設大次於外壝東門之外道北南向

而設御座若有事於明堂及太廟則設大次於東門如

郊壇之制凡致齋則設幄於正殿西序及室內俱東向

張於楹下凡元正冬至大朝會則設斧宸於正殿

施榻席及

熏鑪若朔望受朝則施幄帳於正殿帳裙頂帶方濶一丈四尺

尚乘局奉御四人從五品上

自秦漢已來其職皆在太僕北齊太僕驛驄署有奉

乘十八人官十二閑馬隋煬帝取之置尚乘局皇朝因之增置奉御四人一人掌左六閑馬一人掌右六閑馬一人掌粟草飼丁請受配給及勾勘出入破用之事一人掌鞍韉轡勒供馬調度及療馬醫藥料度之事龍朔二年改為奉駕大夫咸亨元年復故開元二十二年減二人先是別置閑廐使因隸焉猶屬殿中

直長十人正七品下

隋煬帝置十四人皇朝因之開元二十三年減四人

奉乘十八人正九品下

後魏有奉乘郎從五品下後周左右廐各有奉乘二十人隋煬

帝置尚乘局有奉乘十人皇朝加置二十人每開二人開元二十三年減六人

習馭五百人

後周左右廐各有馭夫一百三十人皇朝加置習馭五百人掌調習六閑之馬

掌閑五千人

皇朝置常分飼養六閑之馬

司庫一人正九品下

皇朝初置二人掌六閑庫物開元二十三年減

司廩二人正九品下

皇朝置之

典事五人

皇朝置掌六閑粟草

獸醫七十人

周禮有獸醫下士掌療畜獸之疾病又有巫馬下士二人醫四人掌知馬祖先牧馬

步之神養疾馬以藥攻馬疾也北齊內廐局有馬醫二人皇朝置獸醫掌療左右六閑之馬

尚乘奉御掌內外閑廐之馬辨其麤良而率其習馭直

長為之貳六閑一曰飛黃二曰吉良三曰龍媒四曰騊

駼五曰騏驎六曰天苑左右凡十有二閑分為二廐一

曰祥麟二曰鳳苑以繫飼馬

今仗內有飛龍祥麟鳳苑鵠鑒吉良六羣等六廐奔

星內駒等兩閑仗外有左飛右飛左方右方等四閑東南內西北內等兩廐

凡御馬必敬而

式之非因調習不得捶擊

諸閑廐上細馬若欲調習唯得廐內乘騎不得輒出習

其進御之制而為出入之禁

隴右諸牧監使每年簡細馬三十疋進其祥麟鳳苑

廐所須雜給馬牛別簡廐壯數馬一百疋與細馬同進仍令牧監使預簡數馬一十疋別牧馬殿中須馬任取

充凡秣馬給料以時為差

春冬日給橐一圓粟一斛鹽二合秋夏日給青芻一圓粟

減半凡外牧進良馬印以三花飛風之字而為誌焉

細馬次馬

送尚乘局者於尾側依左右閑印以三花其餘雜馬送尚乘者以風字印印右髀以飛字印印左髀

奉乘掌率習馭掌閑駕士及秣飼之法凡馭馬必視其

齒歷勞逸而調習之

馬四年而兩齒五年而四齒六年而六齒成矣七年而右一齒齒八

年而上下兩邊各一齒缺九年而上下盡缺十年而下兩齒齒十一年而下四齒齒十二年盡齒十三年下兩

齒平十四年下四齒平十五年下五平十六年上兩齒
齒十七年上四齒齒十八年上盡齒十九年上兩齒平
二十年上

四齒平

司庫掌鞍轡乘具

司廩掌藁秸出納

獸醫掌療馬病

凡馬病灌而行之觀其病之所發療馬
病有五勞一曰筋勞二曰骨勞三曰皮

勞四曰氣勞五曰血勞久步則生筋勞久立則生骨勞
久汗不乾則生皮勞汗未差燥而飼飲之則生氣勞
馳無節則生血勞有傷寒者有傷
熱者有瘍者咸據經方以療馬

尚輦局奉御二人從五品上

周禮小司徒中大夫二人
掌六畜車輦又巾車下大

夫二人掌王后之五輅輦車組輓有翼羽蓋古謂人牽
為輦春秋宋萬以乘車輦其母秦始皇乃去其輪而舉
之漢代遂為人君之乘後漢有乘輿六輦魏晉小出則
乘之及過江而亡太元中謝安率意而作及破符堅得
之形制無差大小如一時人嗟其默識宋武執慕容超
獲金鉦輦古之輦輿大率以六尺為度齊武帝造大小
二輦彫節甚工下柵棘輓悉金花銀獸梁大輦中方八
尺左右開四望金鸞樓輓輓隋有六輦大禮皆乘之秦漢
魏晉並太僕屬官車府令掌之東晉省太僕遂隸尚書
駕部宋齊梁陳車府乘黃令丞掌之後魏北齊則乘黃
車府令兼掌之後周則司車輅主之隋又乘黃車府令
兼掌之煬帝置殿內省尚輦局奉御二人正五品皇朝
因之為從五品上龍朔二年改
為奉輦大夫咸亨元年復舊

直長四人正七品下

隋煬帝置皇朝因之又置掌扇掌
翰等員掌執扇及執紙筆硯雜供

奉之

事

掌輦二人正九品下

皇朝初置四人開元二十三年減二人又置主輦奉輦等員掌率主

輦以供

其事

主輦四十二人

皇朝置凡七輦輦六人

奉輦十五人

皇朝置之

尚輦奉御掌輿輦繖扇之事分其次序而辨其名數直

長為之貳凡大朝會則陳於庭大祭祀則陳於廟

輦有七一

曰大鳳輦二曰大芳輦三曰仙遊輦四曰小輦輦五曰芳亭輦六曰大玉輦七曰小玉輦輦舉有三一曰五色舉

二曰常平舉其用如七輦
之儀三曰霽舉則常御焉
凡大朝會及祭祀則出之於

內既事復進而載之凡繖扇大朝會則繖二翰一陳之

于庭

孔雀扇一百五十有六分居左右舊
翟尾扇開元初改為繡孔雀以省

若常聽朝皆

去扇左右各留其三以備常儀

雀豹古今注云華蓋黃
帝所作也與蚩尤戰於

涿鹿之野常有五色雲氣金枝玉葉止於帝上有花蔭
之象故因作華蓋也通俗文曰張帛避雨謂之繖蓋古
今注曰翟尾扇起於殷代高宗有雉雉之祥服章多用
翟羽周制以為王后夫人之車服輿輦有翬即緝翟羽
為扇翬以障
蔽翬風塵也

唐六典卷十一